

九國志

貳

1	4
1475	
17	



門 4  
號 1475  
卷 17

九國志卷七

後蜀高祖自後唐同光三年入蜀至後主廣政二十八年國滅父子二世凡四十一年

宋 路 振 撰

高祖姓孟名知祥字保胤邢州龍岡人晉王弟克讓婿也莊宗建號為太原尹同光三年破蜀以為成都尹充劍南西川節度副大使明年莊宗遇弒明宗立加封太原公長興三年破董璋兼有兩川為蜀王明年建國改元明德是年七月甲子薨年六十一謚文武

昭和十五年  
十一月二日  
購求

聖德英烈明孝皇帝廟號高祖葬和陵

後主名昶字保元初名仁贊知祥第三子明德元年七月丁卯嗣位不改元仍稱明德元年四年改廣政至二十八年宋將王全斌軍至城下出降五月至汴京改封秦國公越七日薨時宋乾德三年六月也年四十七追封楚王葬洛陽

趙季良

季良字德彰濟陰人父胤唐穀熟令季良幼涉書史長於吏治尤善騎射王檀聞其名辟爲保義軍節度推官

楊師厚鎮鄴署元氏令徙魏州都督府司錄參軍後唐莊宗入鄴召見與語以季良有文武才略卽授大理評事依舊司錄參軍充義勝都指揮使軍中謀議多以諮之時兵革屢興屬邑租賦逋久一日莊宗召至切責之季良對曰殿下何時當平河南莊宗正色曰爾掌輿賦而稽緩安問我勝負乎季良曰殿下方謀攻守復務急徵一旦衆心有變恐河南非殿下所有莊宗歛容前席曰微君之言我幾失吾大計自是益加禮遇遷興唐府少尹司錄參軍如故嘗夢手扶御座自謂輔佐之象繇

是頗述天時人事以諷莊宗深納其言及卽位授光祿少卿兼洛南水陸營由都制置使明宗卽位遷太僕卿會宰相任圜兼鹽鐵事薦季良爲判官明年授檢校戶部尙書爲西川官告使兼三川都轉運制置使知祥素重其名一見遂悅奏留爲節度副使累表不許會李嚴來爲監軍知祥深懷疑慮乃誅嚴而署季良爲副使天成三年明宗下詔徙季良爲果州團練使知祥匿其詔書密上表留之明宗不能奪遂允其請自是傾心接待情好欵洽或入謁稍晚知祥必顧左右曰副使來何遲

也及至則讌語竟日每有謀議無不見從時朝廷以夏魯奇李仁矩分鎮遂聞季良言於知祥曰朝廷增兵二鎮張犄角之勢將有不測之變也公處親賢之地以忠信見疑儻失先機則禍不旋踵矣知祥曰計將安出季良曰我甲兵雖衆然而勢孤易動請與東川董璋合從先平遂聞則朝廷兵至我無內顧之憂矣知祥從之及王師入劍門而遂聞已平果無功而還及捷書至知祥匿之謂季良曰北軍漸邇奈何季良曰徐北軍至絲州已來必遁知祥問其故對曰縣師千里饋運不繼彼勞

九國志卷十  
三  
我逸不走何待知祥大笑以捷書示之及克黔夔二州以季良爲武泰軍節度使董璋率衆入廣漢知祥領兵拒之季良留守成都制置經度軍用無闕先是季良嘗與知祥從容語及璋植性狠戾下多怨憤若堅守一城攻之難克矣及聞璋起兵知祥憂形於色季良曰璋不守巢穴自來送死此天以璋授公也俄而璋果敗加檢校太保明宗崩知祥建號加特進守司空平章事宏文館大學士判三司昶襲位加守司徒領山南節度使行與元尹廣政九年卒年六十四謚文肅季良性寬厚居

常無喜愠之色母早亡事從母如所生季札季友皆從弟也並賓位清顯所上遺表言不及私蜀人躋之

### 趙庭隱

庭隱開封人世爲卿家庭隱少知兵律尙氣義始事梁祖子友亮因擊踣墜馬死庭隱董璋等十數人皆追赴汴州知其無過竟釋不問令結事左右末帝卽位唐莊宗入鄴兩河對壘十有餘年時庭隱爲邢州都監累立戰功節度使劉重霸嫉之誣庭隱將所部兵降於莊宗因械送汴州末帝知其非罪又重違邊臣之請乃貶庭

隱於南陽未幾追復舊職王彥章守中都庭隱在其軍中及彥章敗庭隱爲莊宗所獲將以就戮大將夏魯奇奏曰此矧也其材可用遂釋之魏王繼岌討西川以庭隱爲先鋒監押自入敵境卽禁兵士燒廬舍剽財物蜀人德之魏王平成都錄其功奏授左廂馬步軍都指揮使知祥至蜀康延孝陷漢州遣庭隱率兵擊破之擒延孝檻送闕下知祥奏加檢校司空漢州刺史因留屯成都長興初明宗將議伐蜀乃以夏魯奇李仁矩分鎮遂闕以分其勢知祥令庭隱與李仁罕張業率步騎十萬

經略遂聞魯奇堅壁不出戰會唐師入劍門知祥急召庭隱令統銳兵五千至東川與董璋合軍以拒之至中路大寒士卒不能前庭隱撫諭勞問將卒皆奮遂營於普安深溝固柵以養銳一日唐師奄至又分兵斷三驪父水及土橋庭隱密遣軍中善射者五百人伏唐師之歸路乃領軍出營久而不戰至暮唐師退庭隱縱兵追之伏卒齊起表裏合擊唐師大敗初唐師之入劍門也內有堅壁外有勍敵遠近駭震及庭隱之捷人心乃安知祥遣使慰勞賜書以褒之明年別將平魯奇唐師至

九國志卷七  
五  
葭萌而還庭隱班師知祥親勞於郊翌日至其第錫賚甚厚卽授昭武軍節度使留後以鎮遏葭萌知祥送於北郊親舉觴以勸之在鎮踰月上言三泉餘寇盡去乞假一旅之師以拓漢中及秦鳳之地知祥答書慰勉且令休息董璋襲廣漢將攻成都時東川廩藏充實部下多敢死之士其來也衆皆畏之知祥親督諸將召庭隱爲副以率勵士旅璋遺書庭隱而詐達於知祥以書授庭隱投書褚中曰彼必反間之辭不足觀也竦擒董璋而後閱之與璋戰雞蹤橋前頗爲所挫庭隱僞遁璋逐

之知祥與公鐸領兵繼進璋軍亂不成列庭隱復整陣與知祥公鐸合擊之璋軍大敗斬首數千級璋領數騎遁歸東川爲部下所殺庭隱追至東川頓兵城下以待知祥梓州平以庭隱爲節度使會李仁罕自遂州至求領東川庭隱將讓之知祥以庭隱功多且怒仁罕之貪愎遂自領兩川節度使以庭隱爲保寧軍節度使以閬果蓬渠開五州隸之昶襲位李仁罕求總六軍將圖非望以庭隱爲六軍副使以制之未幾仁罕誅改衛聖諸軍指揮使明年移鎮東川廣政初加中書令庭隱久居

大鎮積金帛鉅萬窮極奢侈不爲制限營構臺榭役徒日數千計十年被病懇讓兵柄疏再上從之仍就第冊爲宋王經歲不能起賜肩輿入朝旣謁見昶感動涕泣賜金沃盥及繪錦加太師卒年六十六子崇祚崇韜

### 趙崇韜

崇韜少驍勇有父風累從征討有功署副兵馬使及庭隱卒昶以崇韜領衛聖諸軍使以襲父任廣政二年周師復至境上昶以崇韜與控鶴指揮使袁可鈞同爲北面招討崇韜率勵將士行陣整肅士卒有黥其額爲斧

形者號曰破柴周師前鋒屢爲崇韜所敗至歸安而退二十七年王師來伐崇韜與李廷珪等率兵拒之遇王師於漠源崇韜策馬先登我師大敗崇韜力戰不止兵器皆斷折猶手擊殺數人爲王師所擒

### 張業

業開封浚儀人性沈厚有果斷事梁爲東頭供奉官時兩河兵革未息業頻領監護之任皆立戰功法令峻整士卒畏之莊宗入洛聞業有幹略擢爲列校繼宓伐蜀以業監先鋒兵補右廂馬步軍都指揮使蜀平以所部



兵駐成都知祥入蜀奏授檢校司空簡州刺史時蜀漢賊盜羣起燒劫鎮戍百姓驚擾知祥遣業率兵捕之業令五家爲小保五十家爲大保旬日之內擒獲殆盡討夏魯奇於遂州以功授寧江軍節度使兵馬留後董璋襲成都業在夔州聞之率所部赴難東川平正授節鉞加檢校太傅明德初領右匡聖步軍都指揮使會武定興元兩鎮來附令業將兵二萬屯漢水業至褒梁分布塞柵控扼駱谷秦鳳諸隘會武定軍衙將與蒲谷鎮將任漢謙同謀導晉師入武定業遣戍卒擊走之昶襲位

改武信軍節度使同平章事是歲昶殺判六軍事李仁罕業仁罕之甥也昶慮其爲變詔歸本道未幾召入依舊同平章事兼判度支新收征稅多爲主吏乾沒業作盜稅法犯者十倍征之吏民不堪其命業多視事私第中宰相之門被桎梏者常滿昶知之遽除十倍之法業子繼昭好擊劍嘗與淨衆寺僧歸信同訪劍術士右匡聖指揮使孫漢韶與業不協告業與繼昭同謀不軌翌日令壯士就都堂擊殺之年五十七

武璋

漳字巨川太原文水人父玉汾州別駕漳少勇敢善騎射事莊宗爲定塞都虞侯莊宗以全軍援澤潞漳與裨將數攻其別寨斬首千餘級擢太原衙前兵馬使改匡聖軍指揮使同光初從魏王繼岌入蜀因留成都知祥鎮蜀補衙內右第二指揮使天成初漳與張公鐸迎瓊華公主於北都中國兵革之後盜賊充斥漳被堅執銳通夕不寐至蜀改左第二指揮使奏授檢校僕射其後東討果閬北拓劍利漳屢有功授絲州刺史知祥開國改邛州遷山南節度使漳以褒中用武之地營田爲急

務乃鑿大洫以導泉源溉田數千頃人受其利入爲奉鑾肅衛指揮使未幾改山南加同平章事廣政七年卒於治所年六十四漳質厚儉約所至有治迹俸入之外不營貲產蜀人稱之

### 李肇

肇汝陰人父璟唐神策兵馬使肇少以材勇從父征伐後隸宣武軍補左建牙都頭累遷陝虢馬步軍都指揮使莊宗平梁恢復平洛割宣武一軍隸於河東時知祥爲北京留守待之甚厚同光中以所部兵從魏王繼岌

九國志卷七  
九  
討蜀蜀平班師康延孝至普安叛擁衆回據廣漢肇在  
其伍中延孝敗肇被俘而知祥親釋其縛擢爲衙內都  
指揮使未幾奏授嘉州刺史長興初我師圍夏魯奇於  
遂州唐師來援劍門不守肇領兵赴普安以拒唐師不  
得進以功改漢州刺史駐軍絲谷明年董璋率兵攻成  
都軍勢甚盛遣使致書於肇諭以禍福肇素不知書擲  
之於地曰此不過勸我叛爾因并其使殺之梓州平加  
昭武軍節度使昶襲位肇以足疾不卽時來朝昶怒罷  
其軍權授太子少師致仕於邛州安置坎壈不得意廣

政八年卒年七十

李仁罕

仁罕字德美陳留人少隸宣武軍爲小校容貌瓌偉梁  
祖爲四鎮節度署爲衙內昭宗幸鳳翔梁祖遣仁罕奔  
間行在因修貢禮梁祖革命補宮苑儀鸞等使歷許蔡  
華三州馬步軍都指揮使莊宗伐蜀合監先鋒軍知祥  
領鎮奏授馬步軍都指揮使康延孝叛知祥命仁罕討  
平之以功授彭州刺史遷蜀州夏魯奇鎮遂州稟朝廷  
之命繕治兵甲將圖蜀知祥與董璋謀先討魯奇令仁

罕攻遂州拔之以仁罕爲兵馬留後未幾承制授武信軍節度使又以所部兵定三峽走夔將安崇院知祥卒命仁罕輔政昶嗣位令判六軍事仁罕奉幼主無隱情自以先朝舊老遇事必諫時控鶴指揮使張公鐸內醫韓繼勳封德庫使韓保貞弓箭庫使安思謙等皆昶在東府時舊所親狎素不爲仁罕所禮皆懷怨怒每譖仁罕欲納王衍妃徐氏爲側室遂誣以姦昶大怒俟仁罕入謁令武士擊殺之年六十二

李延厚

延厚洛州平恩人父及唐邢州別駕延厚少有膽畧善騎射從父琮爲洛州節度使率衆歸於梁祖延厚亦從焉梁補左拱辰指揮第二都頭後唐同光中以所部兵從魏王入蜀改馬軍右驍銳第一指揮使康延孝入漢州知祥遣延厚率精兵二千會李仁罕往討之將行延厚集將卒於營口誓之曰今出師征討不三旬必破賊乃立功圖賞之日也士率有誓國報恩不以家爲慮者立東廂衰疾怯懦厭爲征行者立西廂無自苦也得請行者七百人逐延孝西寨斬首百餘級竟拔其城以功

奏授檢校右散騎常侍改右廂馬軍都指揮使歷陵果  
州刺史源州押衙文景琛叛延厚討平之岐軍逼文州  
延厚率衆赴援卽日解其圍昶襲位遷雅州刺史永平  
軍節度使未幾移鎮昭武軍廣政九年卒年六十一

張公鐸

公鐸太原樂平人父頊唐儀州兵馬使公鐸身長七尺  
倜儻有節義好文史之學知祥爲北京留守錄爲親從  
及出鎮成都補爲牙校從高敬柔迎公主於晉陽轉義  
勝定遠都知兵馬使董璋舉兵襲我廣漢先鋒兵將至

成都公鐸率諸軍從知祥逆戰於雞蹤橋我師不利公  
鐸率所部兵力戰直衝其腹璋兵大敗梓州平以功授  
簡州刺史遷奉聖控鶴都指揮使知祥病公鐸與趙季  
長趙庭隱李肇等同受遺命輔政昶襲位授保寧軍節  
度使爲政嚴猛寮吏畏憚時承前蜀之弊獄訟繁多案  
牘堆積公鐸量其所犯隨意裁決無不稱當在任六年  
民被其惠先是屬邑連歲多逋租公鐸詰其由乃豪民  
猾胥乾沒賦稅時令佐已有授代者公鐸悉勒止之令  
盡徵其租而後解由是不數日徵錢糧數萬貫斛時論

九國志卷一  
三  
以爲嚴而不殘遷寧江軍節度使公鐸馭下嚴正宿衛  
二十餘年宮禁寧謐初染心疾昶憂之爲玉局洞開靈  
室壇親署青詞以醮焉廣政八年卒年六十二

張虔釗

虔釗遼州榆林人父簡唐檢校尙書左僕射虔釗少以  
武勇事唐武皇莊宗之世累補左右突騎軍使莊宗嘗  
以偏師取鎮陽命虔釗率騎勇爲前鋒屢挫賊銳遂陷  
其城明宗卽位以虔釗有將帥才擢爲隨駕親軍都指  
揮使歷遼春二州刺史天成中鎮定節度王都阻兵連

結契丹爲邊患命虔釗爲北面行營兵馬都監進討契  
丹殺傷甚衆虜不敢南下遂圍定州百日而城陷斬王  
都降其餘衆師還以功遷還海將軍節度使未幾移鎮  
山南兼西面諸州馬步軍都部署應順初閔帝卽位以  
鳳翔節度使潞王從珂有異志發兵討之詔虔釗爲犄  
角師次岐陽人心離散降於從珂虔釗憤之乃退歸南  
鄭率孫韶以山南之地納欵於蜀知祥遇之甚厚委以  
節鉞昶襲位加中書令歷左右匡聖馬步軍都指揮使  
出爲昭武軍節度使及漢祖卽位乃移鎮梁州以觀朝

廷之變會晉昌軍節度使趙匡贊鳳翔節度使侯益俱謀歸蜀遂以虔釗爲北面行營招討使應接經畧俄而趙匡贊侯益請昶出師掠定三秦因命虔釗與韓保貞等總師五萬出散關雄武軍節度使何重建出隴右奉鑾肅衛都虞侯李廷珪出子午谷會於雍州廷珪始出子午谷聞匡贊爲王景崇所逼棄城自拔東去遂先退師時虔釗福誠保貞師次陳倉謀不相協而侯益聞匡贊已去廷珪班師亦誠欵中變閉壘不出司天監趙廷樞累以雲氣候不利諷於保貞保貞惑之乃與福誠率

所部取隴州道會重建歸蜀虔釗留寶雞以勢孤不可深入遂班師士卒夜發部伍不整至興州自以功業不成感憤而卒年六十六

### 潘仁嗣

仁嗣浮陽東光人父廷訓密州都指揮使仁嗣少倜儻尙氣起家爲保義軍兵馬使後唐魏王繼岌西伐仁嗣以所部兵從入蜀蜀平改左右廂馬步軍都指揮使知祥受節鉞留在麾下康延孝襲漢州知祥遣仁嗣率兵救之連破數寨遂屯於漢州董璋興兵趨成都城外皆

爲敵境仁嗣以所部兵陣於赤水璋以全軍二萬擊之仁嗣大敗以十數騎潰圍而出身被十餘創卧於血中及璋敗獲免知祥親至其第以藥傅之明德二年奏授武定軍節度使源壁等州觀察營田處置等使之任卒於成都年四十六

龐福誠

福誠河東太谷人少善騎射倜儻交結豪俠傾竭家產中原兵亂福誠聚徒鄉里剽掠孫鎮知祥爲北都留守署昭爲太谷主簿令招諭福誠因相率歸附從知祥入

蜀補衙內指揮使王師陷劍門從趙庭隱率兵據石橋福誠夜領兵數百人循水次東北上山攻王師夾其腹背王師不虞其至舉軍驚擾因奮擊破之以功遷茂州刺史知祥建國加檢校右散騎常侍昶襲位厯資縣邛三州刺史奉饗肅衛馬步軍都指揮使會張處釗經畧秦中以福誠爲行營馬步軍都虞侯克寶雞分兵吳山進攻隴州以歸改左驍騎軍都指揮使武寧軍節度使廣政十五年授口衛上將軍以目疾罷卒年七十一

李彥琦



彥琦字子溫京兆長安人本姓楊氏祖父皆隸神策軍  
彥琦善騎射有權畧唐中和初鳳翔李彥真委以心腹  
之任易姓李氏齒於諸子後昭宗西幸梁祖迎駕攻逼  
岐下者累年及昭宗東遷長圍方解大軍之後府庫空  
竭彥琦請使甘州以通回鶻往復二載美玉名馬相繼  
而至所獲萬計茂真賴之劉知俊自靈武班師途經長  
城嶺梁將率精銳數萬躡其後彥琦與俊同設方畧擊  
敗之潞王之守岐下也諸道將急攻其壘彥琦時在圍  
中罄家財以給軍用潞王篡位以功授檢校太傅知河

陽軍府事俄授鎮州兵馬留後晉祖入洛陽彥琦罷職  
西歸家財素厚乃閉關自奉游心釋氏專務散施廣政  
十年王景崇納欵於蜀彥琦因歸成都授左將軍維州  
刺史卒年八十八

孫欽

欽幽州安次人性忠烈善騎射少遇亂隸安義軍節度  
使充衙內都頭後改補合州衙內都頭兼土客都虞侯  
從本州刺史徐章入蜀會知祥鎮成都長興初轉充右  
截山都頭董璋來寇戰雞蹤橋有功遷普州刺史昶襲

位累遷東川武德軍左奉聖都指揮使廣政十五年令以所部兵北攻欽將行白於都監王承丕承丕將謀亂欲害判軍府事郭延鈞曰詰朝當領部卒二千人介冑閱於雄義營欲與府公觀之欽未知其由從容謂承丕曰卒閱習舊皆木刀竹槍今都監令執帶器甲將士臨行又是詔旨或有不虞如何承丕遂止又明日欽已具行裝入辭承丕承丕止之同詣府中謁延鈞及延鈞送承丕上馬承丕頤指數卒擊殺延鈞自稱准詔處置軍府事卽據府廳指揮放諸司罪人分遣將校領兵屯果

閬縣劍州拒守劍門關發帑廩以賞將士自辰至己亡命之徒應募而至者千餘人明日大會將校寮屬欽言於衆中曰郭延鈞旣抵朝憲遠近未知其由公受命權總留務願出詔書以示軍府承丕曰作好官何問詔書欽知其已判乃給之曰州城内外人情未安願爲公督部下兵以伺察之因躍馬而出承丕連呼不止馳至本軍立召將士告其事遂率衆徑趨府中承丕左右皆奔散因擒斬之傳首成都加檢校太子賓客二十五年寢疾卒年七十二

何重建

重建其先回紇之別部居雲朔間祖允慶父懷福從後唐武皇世著勲闕因家於太原重建初事晉祖爲奉德馬軍都指揮使歷驩睦曹三州刺史檢校司徒會延州節度使丁審琪殘暴貪冒蕃部苦之重建以所部兵攻其城審琪遁去晉祖卽以重建權節度兵馬留後下車諭以威福邊民安堵就加昭武軍節度使累遷涇鄧貝澶孟五鎮節度使皆以廉儉簡易稱未幾移鎮秦州廣政十年契丹犯中原虜使賁僞詔至重建不勝其憤謂

將吏曰吾事石氏二主八擁旄節人臣之榮已極矣豈能交臂以事戎狄乃斬其使以秦成階三州歸欵於我昶遣右千牛衛上將軍李繼勳馳往慰諭賜予甚厚加特進同平章事依前雄武軍節度使時固鎮與鳳州未平重建悉經畧討平之昶大舉兵北伐遣張虔釗出大散關以重建爲招討使由隴州路以進師無功而還堅請入覲昶不許二十一年加兼侍中卒年六十九

孫漢韶

漢韶太原人祖昉唐嵐州刺史父存進振武節度使漢

九國志卷七  
一  
韶幼有器局風儀峻整存進尤愛之起家安定軍使知  
祥留守晉陽屬蕃渾侵擾邊郡表令漢韶督軍進討莊  
宗知其可用遂委以戎律大破虜寇擒獲甚衆以功授  
檢校右僕射蔡州刺史明宗卽位遷彰國軍節度使觀  
察留後累遷昭武武定等軍節度使閔帝嗣位加特進  
漢韶以其父名上表讓之改檢校左僕射制曰改會稽  
之字抑有前聞換懷寶之文非無故事及潞王入洛遂  
與張虔釗等奉表歸附及謁見與知祥敘汾上舊事及  
洛中更變相對感泣知祥曰豐沛故人相遇於此何樂

如之於是賜第宅金帛供帳什物悉官給之授永平軍  
節度使昶襲位加同平章事明德三年入爲匡聖馬步  
軍都指揮使廣政十年爲山南節度使何重建以秦階  
成三州歸附鳳州石奉頽堅守不通我使昶遣漢韶入  
城宣慰號令嚴肅秋毫無犯駐數日乃還加檢校太師  
雄武軍節度使後以疾乞解兵柄封樂安郡王賜肩輿  
昇入謁卒年七十二漢韶忠勇有父風而重厚過之居  
藩閫皆有治迹始以去危卽安委質於我頗竭股肱之  
力終保富貴識者多其淳慤

高彥儔

彥儔太原人少善騎射慷慨有大節知祥留守太原召為軍校從入成都授親衛指揮使昶襲位遷茂州刺史廣政十年秦州何重建以城降以彥儔領雄武軍節度使領衆守其城未幾召歸領右衛聖馬步軍都指揮使十八年周師攻秦鳳以彥儔為北路行營招討使與李廷珪呂彥琦率兵赴援與周師遇於唐倉大戰我師敗績彥儔保退青泥嶺周師遂克偕成秦鳳等州彥儔歸成都昶釋不問改寧江軍節度使二十七年王師來伐

分兵由峽路攻夔州彥儔謂副使趙崇濟監軍武守謙曰北軍涉險遠來利在速戰宜堅壁待之守謙曰寇據吾城下而不擊將何待也乃獨領麾下千餘人以出時王師頓白帝廟西遣騎將張廷翰引兵與守謙戰我師敗走廷翰乘勝登城彥儔整衆將出拒戰王師已乘而入彥儔力戰於城下不勝身中十餘槍左右皆散去彥儔奔入府中反拒其門判官羅濟勸彥儔單騎歸蜀彥儔曰我昔已失天水今復不能守夔州縱不忍殺我何面目見蜀人乎濟又勸其降彥儔曰老幼百口俱在成

都以一人偷生舉族何負今日止有死爾卽解符印授  
濟曰君自爲計俄而王師壞門彥儔挺劍拒之殺十餘  
人於是登樓縱火自焚而死大將劉光又憐其忠蓋收  
其骨以葬焉

李廷珪

廷珪太原人幼慧黠七歲隸知祥帳下爲給使從入蜀  
爲牙軍指揮使征康延孝有功遷陵州刺史知祥征東  
川廷珪權領親軍以從董璋平轉資州刺史累改眉蜀  
二州昶襲位遷奉聖控鶴都指揮使領興元節度使歷

雅遂聞三鎮加兼侍中廣政十八年周師攻秦鳳以廷  
珪爲北路行營都統高彥儔呂彥珂爲招討廷珪遣先  
鋒指揮使李進以兵據馬嶺分兵出斜谷營於白澗將  
腹背以攻周師又遣染院使王巒領兵出唐倉與周師  
遇我師敗走王巒死之而馬嶺斜谷之兵聞之皆退奔  
高彥儔與諸將謀退守青泥嶺由是秦鳳階我之地皆  
陷於周矣廷珪上表請罪昶釋不問明年來朝遷左右  
衛聖諸軍馬步軍都指揮使仍分衛聖步騎爲左右十  
軍以武定軍節度使呂彥珂爲之使並隸於廷珪二十

八年王師拔劍門加廷珪太子太傅令從元喆統兵以拒王師至緜州聞王昭遠趙崇韜之師皆敗元喆懼退保東川翌日奔歸成都所過盡焚其儲蓄及王師入成都行營都監王仁瞻按籍詰所在軍資將歸罪於廷珪廷珪問計於部將康延澤曰吾觀王公志在聲色苟足其欲則置而不問矣廷珪素儉約不蓄妓樂遂求於姻戚家得女妓四人復假貸金帛直數百萬以遺仁瞻繇是獲免歸朝爲右千牛衛上將軍卒

王彥銖

寡不敵人心動搖奉虔與庭隱率勵士卒竟敗王師以功授檢校右僕射昶襲位領嘉州刺史文思使遷右金吾衛大將軍爲昭武軍都監屬夏秋多雨嘉陵江溢出城奉虔置堰開湍瀨二十餘處洩其蓄水築堤以護之城池克完人被其利授昭武軍節度自監護擁節旄自奉虔始人皆榮之入爲左右街功德使卒年六十三

王昭遠

昭遠成都人幼孤貧年十三依東都僧知誣爲童子知祥入蜀飯僧於府署昭遠持巾履從知誣得入時昶方

就學見昭遠聰慧留給事昶左右昶嗣位以爲卷簾使  
遷諸司使會樞密使王處回得罪乃以昭遠爲通奏使  
知樞密事機務一以委之府庫財帛恣其所取不問未  
幾遷山南節度使判官張廷偉言於昭遠曰公素無勲  
業一旦位至樞近不自建大功何以塞時論莫若遣人  
致書通好并閤令其發兵南下我卽自黃花子午谷出  
兵應之使中原表裏受敵可坐有關右之地則君之功  
無有出其右者昭遠然之乃言於昶遣人問行齋蠟書  
以往太原爲疆吏所獲及王師來伐昶令昭遠與韓保

貞趙崇韜等領兵以抗王師昭遠好讀兵書頗以將畧  
自任始發成都昶遣宰相李昊等餞於郊外昭遠酒酣  
攘臂而言曰是行也非止克敵當以此數萬彫面惡少  
取中原如反掌爾及行執鐵如意指揮軍事自方諸葛  
亮時王師已破劍門昭遠大懼俄與王師遇於漢源趙  
崇韜布陣將戰昭遠據胡牀不能起崇韜敗乃免冑棄  
甲走投東川爲追騎所獲送闕下授左領軍大將軍開  
寶中卒

安思謙



思謙并州人幼事知祥於太原以勤恪聞知祥入蜀補  
爲軍校昶襲位頗見親信歷簡功彭三州刺史奉鑿控  
鶴馬步軍都指揮使武泰軍節度使未之任改匡聖馬  
步軍都指揮使山南節度時鳳翔監軍王景崇以城歸  
順命思謙率兵應接且畧地關中會漢兵圍鳳翔燒其  
雙門景崇遣使來求救昶遣思謙及韓保貞等率兵救  
之兵次右界漢兵屯寶雞城思謙令保貞分兵趨隴州  
逼汧陽以分其勢又遣先鋒將申貴等分兵走摸壁設  
伏時家林貴以數百人晨壓寶雞列陣以誘漢兵漢兵

士擊殺之并其三子廣政十七年也

### 焦彥賓

彥賓字英服滄洲清池人父軫唐兗海節度使彥賓少  
聰敏多智畧事後唐武皇尤所委信及莊宗卽位遷左  
監門衛將同正四方館使出護邢州兵知祥移鎮成都  
詔以彥賓爲監軍使與知祥同入蜀康延孝據廣漢彥  
賓說知祥令召董璋與之協力討賊遂擒延孝明帝卽  
位忿閹監輩怙勢擅權先朝使四方及逃遁不出者皆  
就戮之死者殆盡彥賓爲知祥保護獲免朝廷因以李

九國志卷一  
三  
歲代之彥賓辭疾不歸朝知祥因令判都提學院事未  
幾轉左驍衛上將軍以年老乞代從之彥賓乃營別墅  
鑿池沼植蒲菘養魚以自給祖襲位以先君舊友命全  
給俸祿而不令覲謁俾遂其性廣政十五年卒年七十  
八

趙進

進定州人少以膽勇隸天雄軍籍時河北宿兵進累戰  
有功洎莊宗入洛猶在行間屯於清廩祿既薄又不時  
給士卒多怨憤思亂者十七同光末與本軍皇甫暉等

爭出戰貴僞遁漢兵逐之爲伏卒所擊退入寶雞城思  
謙次渭水將引軍濟會羅睺保義軍與東 相應掩我  
不備多殺士卒而漢兵復振思謙與諸將議曰糧儲將  
盡而賊勢且盛不如釋之以圖後舉遂班師十二月景  
宗又來告急昶復督思謙令進兵思謙請先運糧四十  
萬斛然後進軍昶覽表不悅謂左右曰古之良將因敵  
取資近者契丹以數十萬衆入中原豈先事飛輓耶揣  
思謙此意必不爲朕進取也乃發興州乾渠渡糧食及  
山南諸倉米數萬斛屯鳳州以益之思謙不得已遂進

軍次大散關申貴以所部先進擊漢兵燒箭箬寨毀閣道遁去貴盡銳追之及安都思謙進軍玉女潭又殺漢兵千人漢兵退屯寶雞城思謙駐軍摸壁時保貞之師攻隴州不能下思謙遂遷延不進會漢兵陷鳳翔景崇死乃班師上表待罪昶釋不問召歸移鎮閬州仍留宿衛思謙以受任無狀爲物議所薄頗不自安昶旣誅張業宮禁門衛悉加嚴警思謙以其疑已頗惡之言多悖慢三子辰嗣裔恃父權恣橫國人畏之會翰林王藻乘間奏思謙出怨言將圖不軌昶懼翌日俟其入朝伏壯

共推副趙在禮相率夜犯鄴城城中士卒莫有鬪志進等因陷其城未踰旬兵數萬在禮署進衙內都虞侯三城巡檢使莊宗遣元行欽以其言聞因詔明宗馳往招諭及入城乃共推戴遽有洛中之變天成初除貝州刺史鄴都衙內指揮使明年移典寧州屬慶州判遣進討平之遷雅州刺史知祥入蜀進來謁覲知祥以進始謀叛逆將誅之進大懼趙季良諫曰莊宗季年天下思亂匪獨貝魏一境公國之懿親所宜責以干紀加其顯戮進自知必死歸命於我所以撫納以責其後效知祥納

之董璋之亂我師致討進戎服謁見而言曰進荷明公  
不殺之恩今日有所報矣請前蹈白刃決命破賊乃署  
爲前鋒監陣使先登立功璋平轉左衝山指揮使昶襲  
位歷忠鳳邛普四州刺史右匡聖步軍都指揮使所至  
軍政修舉戍卒有疾苦者必撫問周悉當盛暑沍寒未  
嘗勞役將士以此樂爲之用廣政十七年督部兵戍漢  
中逾月以疾聞召還卒於道年六十一

石處溫

處溫萬州人本波斯之種仕前蜀爲利州司馬同光中

知祥入蜀補萬州管內諸壇點檢指揮使率義兵同收  
峽路時通州大將王允瓊侵擾邊鄙及草寇杜景溫劫  
束鄉豪殺縣令牟孟剽畧戶口焚燒村落處溫與諸軍  
討平之知祥遺書褒美轉寧江軍節度都知兵馬使萬  
州管內義軍都指揮使昶襲位遷獎州刺史處溫初據  
石市招納亡命遠近多歸之由是廣事耕墾常積穀數  
萬千石前後累獻軍糧二十餘萬石加之以寶貨昶嘉  
之加檢校司空未幾授萬州刺史移簡州卒年八十

孟思恭

思恭字近禮潁川人父彥暉嘗爲許州獄吏前蜀王建嘗隸忠武軍坐事被繫謂彥暉曰卿能免我他日將厚報彥暉遂縱之令亡去及建霸蜀遣使迎之授簡州刺史遷漢州團練使思恭弱冠奇峭猿臂善射起家保信軍使建嘗集文武射苑中思恭屢中的建大悅賜衣服以其女妻之爲駙馬都尉累遷靜塞軍團練使王衍襲位爲北路行營都指揮使知祥鎮蜀以其宗姓補先登指揮使以所部兵從董璋遣思恭分兵討集州誠之曰賊少則與戰賊衆則退守要害我將濟師及遇賊思恭

與之戰不利退求濟師璋怒放思恭歸知祥免之明年隨趙庭隱破璋於雞蹤橋以功改清遠指揮使昶襲位加檢校司空改雄義都指揮使屯梓州累遷飛棹都指揮使歷劍階忠三州刺史思恭有膽畧善撫士卒廣政二十年爲峽路行營都指揮使屯赤英山時秋暑未退思恭苦熱食冷物浴寒水致疾卒於任年七十二

申貴

貴潞州人弱冠有勇力初事李彥珂爲帳下卒天成中歸於知祥累補定遠都頭從征伐身當矢石深爲諸將

之所推許改決勝耀武指揮使昶襲位遷右衛聖都指  
揮使歷昌渝文眉四州刺史貴貪鄙殘虐所在聚斂財  
貨民不勝其弊典眉州受財鬻獄尤恣暴橫嘗指獄門  
謂左右曰此我家錢爐其不道如此初兼五縣巡檢令  
其子元寶與州吏許延祺誣構民連賊枷禁以求賂被  
訴下獄責授貴維州司戶參軍馳驛發遣至犀浦賜自  
盡

九國志卷七終

九國志卷八

宋 路 振 撰

東漢世祖以乾祐四年稱帝至英武帝廣運六年國滅  
歷四王凡二十九年 十國紀年及通鑑作北漢此  
與五代史同

世祖姓劉名旻初名崇後漢高祖母弟也為河東節度  
使乾祐三年隱帝遇弒郭威篡漢四年正月戊寅即  
位於晉陽仍用乾祐年號受契丹冊命在位四年薨  
年六十廟號世祖

睿宗名鈞初名承鈞旻次子受契丹冊命仍稱乾祐七  
年行三年喪服除改乾祐十年爲天會元年至十二  
年七月戊申薨年四十三諡曰孝和皇帝廟號睿宗  
少主名繼恩本姓薛鈞養爲子嗣位六十餘日爲郭無  
爲所弑

英武帝名繼元本姓何亦鈞養子旣襲位仍稱天會十  
二年越五年改元廣運廣運六年五月癸未降於宋  
降封彭城郡公淳化中薨追封彭城郡王

東漢

蔚進

進太原人少有膂力身長七尺日行二百餘里高祖鎮  
并汾進以材官給事及高祖領軍令負霸勒開運未南  
行留進於太原爲崇翊衛卽授馬步軍指揮使鈞襲位  
領建寧軍節度使典親軍如故繼恩監國郭無爲受詔  
輔導世子無爲與進不協出爲代州刺史時無爲專政  
繼恩潛欲圖之進知其必亂自以居親衛之地頗懷危  
感及有中山之命忻然卽路未幾繼恩遇弑國人皆以  
進爲先見以城納欵歸朝授左衛大將軍領檀州刺史

卒年七十二進無他能惟掌兵方嚴所至不敗事劉氏四主以質直聞歸老中國祿至二千石亦武夫之終吉也

張元徽

元徽邢州武安人少以沈勇隸本城爲兵累轉至列校高祖鎮并汾召置帳下累從征討有功晉開運未破契丹於三交以功授代州刺史歷雲州防禦使遷代州與崇素相友善及崇建號侍衛親軍遷武寧軍節度使崇舉兵南下將圖周室以元徽爲前鋒與周師遇於巴公

原元徽以東軍先登陷陣擒監軍使一人降其步卒千人而旋崇大褒賞之元徽乘勝復入馬倒爲周師所擒殺之其麾下十餘騎畢力血戰奪其尸而出俄而崇衆亦敗先是前鋒兵將次巴公一夕營中刁斗皆噀元徽亟遣詣崇大寨易之凡易數十皆噀而不可擊因以白崇崇怒曰故要吾金鉦耶遂止是夜有大星墜元徽營中明日果敗元徽沈厚有將帥材善撫士卒輕財好施雖爵祿豐厚而家無餘貲旣而軍吏爲立廟晉陽城西北隅塑其像歲時祀之見者必掩泣



鄭進

進開封陽武人身長七尺餘翹勇多力漢祖鎮并汾以材官給事累從征討有功卽位遷侍衛馬步軍都指揮使鈞襲位以先朝勲舊賜子彌厚進性慷慨重然諾好施家無餘貲繼元立馬峯典機密性鄙吝與進不協峯怒悉奪其兵柄進不堪辱詬之於朝繼元怒翌日送定襄安置遣人殺之於路

衛儔

儔吐渾族人少事鈞爲蕃落小底善騎射驍勇絕倫明

書計通六蕃語鈞襲位遷如京使令專掌吐渾一軍以從征討所向多克捷虜援兵每至卽遣儔居前鋒軍中凡布列烽燧措置寨柵皆儔爲之繼元立爲闡人衛德貴所嫉出爲遼州刺史吐渾數千人遮道請留繼元不許自是一軍失帥不復可用矣儔少長蕃中不樂爲郡頗出怨言繼元慮其爲變潛遣人殺之

李隱

隱雁門人少以驍勇隸緣河十寨善騎射有膽畧鈞襲位以軍功擢授馬步諸軍都引進使累從征討性純直

未嘗曲事權要衛儔出知遼州隱惜其忠勇為倖臣所  
逐頗憤惋形於言德貴聞而惡之白於繼元即日送嵐  
州安置未幾殺之

九國志卷八 終

九國志卷九

宋 路 振 撰

南漢唐天祐元年烈宗為廣州節度使至後主大寶十  
四年國滅凡六十七年斷自高祖乾亨元年為始凡  
四主實五十五年  
烈宗姓劉名隱父謙為封州刺史有三子曰隱台巖乾  
亨元年冬謙卒士民謀亂隱誅之嶺南節度使劉崇  
龜表為封州刺史天祐元年朱全忠奏為清海軍節  
度使梁開平元年封大彭王三年改封南平王四年

進封南海王乾化元年三月丁亥薨年三十八諡曰  
襄乾亨元年追尊曰襄皇帝廟號烈宗陵曰德陵  
高祖名龔初名巖又名陟謙庶子乾化元年五月甲辰  
梁以爲清海軍節度使三年正月龔封南平王真明  
二年八月癸巳稱帝建國號曰越改元乾亨追尊祖  
安仁曰太祖父謙曰代祖兄隱曰烈宗乾亨二年十  
一月改國號曰漢凡改元三乾亨九年白龍三年大  
有十五年三月丁丑薨年五十四諡天皇大帝廟號  
高祖陵曰康陵

殤帝名玢龔第三子初名宏度封賓王改封秦王及嗣  
位更今名改大有十五年爲光天元年二年三月丙  
戌遇弒年二十四諡曰殤

中宗名晟初名宏熙封晉王旣弒玢遂嗣位改光天二  
年爲應乾元年十一月丁亥改乾和十六年八月辛  
巳薨年三十九諡曰文武光聖明孝皇帝廟號中宗  
陵曰昭陵

後主名鋹晟長子初名繼興封衛王乾和十六年八月  
辛巳襲位改是年爲大寶元年至十四年二月宋師

入城出降封恩赦侯時宋開寶四年也八年進封彭城郡公太平興國初進封衛國公五年薨年三十九追封南越王或云歸葬於韶州之越王山

南漢

劉洪操

洪操字貞度龔第九子洪澤之母弟也幼知書及長有識量大有中封萬王十一年吳權攻交趾皎公羨求救於龔龔欲乘其亂而取之遣大將梁克真率兵南下龔自護其軍以洪操爲靜海軍節度使封交王令統衆趨

白藤時吳權已殺公羨而據交趾親率衆來逆戰先於海口多植捷楸悉銳其首以鍔冒之潮水方漲權乘輕舟引兵挑戰洪操逐之須臾潮退戰艦爲楸楸所絀士卒皆覆溺死者過半遂擒洪操殺之

劉洪杲

洪杲字日宣龔第十子母尚儀謝氏名宜清有寵洪杲十歲封循王好步鬪復便弓馬以膽勇聞諸兄皆尚儒學或勸令讀書洪杲曰我家立功立事皆起馬上獨使我老一經乎龔以兵書教之遂畧通大義光天初循州

賊張遇賢自稱中天八國王擁衆數萬攻下郡邑洪杲請統衆討賊玠以其尙幼不許洪杲曰兵法尙變不尙齒也因令越王爲都統洪杲副之次錢帛館軍士方食賊衆奄至洪杲率親信數百人介甲躍馬徑入賊中殺數百人賊爲之少却俄而越王領衆繼至與賊大戰自辰及午賊衆益盛圍我師數重矢下如雨軍人多死洪杲矢盡挺劍力戰流血滿袖裨將萬景忻等蒙以大楯翼二王以出賊解去洪杲以戰功授桂州觀察使未幾與晉王同謀篡弒應乾初爲諸道兵馬副元帥參政事

晟初立國中謗議騰沸洪杲請歸罪於劉思潮等晟不從反爲思潮等所謂以洪杲謀爲亂晟遣思潮偵之一日洪杲與親信飲酒第中思潮與譚令禔領衛兵排闥而入斬其首以徇

蘇章

章封州人少事隱爲牙將性忠敢有勇力從征譚玠盧琚有功薛王奏署衙內馬步軍都指揮使從隱討盧延昌於韶州隱率舟師出雙石會天大霧昏暝如夜韶人四出以鍬纜繫巨鈎投隱舟中士卒驚撓章引弓射殺

數人以巨斧擊鈎鈎皆斷折纜不能施韶人乃退翌日  
進逼其城城上望樓中有人罵隱言頗穢褻隱慙甚不  
敢視左右章伏舵樓中引弓射罵者應弦而斃舟中皆  
鼓譟時江水暴漲自清遠峽以北湍瀨尤惡糧運不繼  
會延昌父光倜自虔州擁兵來援隱與戰屢敗乃班師  
韶人以兵襲我後遂捨舟而徒士卒不成列隱馬斃章  
以所乘馬接隱因徒行為後殿韶人不敢逼以功遷封  
州刺史充左右衛使龔襲位命章典禁衛諸軍曰龍中  
楚人乘舟師來伐圍封州敗我師於賀江溺死者千人

龔乃遣章領神弩軍三千人戰艦百艘援之章至賀江  
沈鍊索水中兩岸設巨輪以挽索築連堤以隱之伏壯  
士堤中章以輕舟逆戰佯不利楚人逐之堤中挽輪舉  
索楚艦不能進退乃以強弩夾水射之楚人殲焉收戰  
船百艘以歸遂解封州之圍以功遷團練使章子五人  
俱爲中郎將豪俠任氣所爲不軌番禺號爲五郎將章  
年老不能教訓會有告其謀叛者逮捕下獄悉斬之章  
以功得不坐慙悸成疾大有十年卒

吳懷恩

懷恩番禺人事龔爲內府局丞性謹愿典宿衛二十餘年未嘗有小過玠襲位遷內常侍玠好宴樂東西兩教坊伶官千餘人常晝夜出入宮中懷恩屢言於玠曰今禁中自有簫船府內樂工百餘皆善音律夜宴用此足矣焉用教坊若夜雜入禁中不拘關籍恐姦人竊發不可不慎玠不聽未幾果爲陳道庠所弑晟襲位授宮闈諸衛押番乾和六年加開府儀同三司西北面招討使與指揮使吳珣領兵侵楚親冒矢石半歲間取梧桂六州之地以功加濮陽縣公大寶中王師取郴州張懼以

懷恩爲桂州團練使令治戰艦懷恩馭下方嚴臨事精至每舟成必自臨視材有良窳不等及制度疏畧不如法者必榜役工役者多怨之又造龍舟十以備銀親征舟成懷恩以綿幕其手徧捫鈎楯匠區彥希在側運斤斬之首墮船中左右皆驚走後數日擒彥希斬於市懷恩治兵嚴整所至輒有功及被害國人憂之

### 陳道庠

道庠潁川人父璠唐末避亂於封州膂力絕人隱聞其忠勇召至帳下隨隱入廣州遷雄虎將軍卒道庠幼俊

爽起家爲虎賁郎驍勇有父風大有乘給事晉王府龔疾亟命以道庠爲元帥府馬步軍都指揮使光天初張遇賢起循州大掠郡邑道庠與萬景忻從越王循王東征遇賊錢帛館賊圍之數重自辰及午我師殆盡道庠與景忻奮劍大呼殺十餘人賊衆披靡於是掖二王而出玠旣立所爲不法疑羣弟圖已每宴集則令宦官守闈供奉將吏悉露索而後入及晟將爲亂謀於道庠玠好角抵於晉王府中道庠因引多力者劉思潮等數人習角抵於晉王府中玠聞而悅焉翌日大置酒長春宮召

角抵與諸王觀之至夕玠大醉旣罷晟遣道庠等掖之因拉殺玠血濺寢門左右皆散走晟立以道庠爲功臣領英州刺史出入宮中賞賜優厚旣得志頗誅殺勳舊功臣劉思潮等皆相次被誅道庠不自安特進鄧伸與璫有舊嘗遺道庠漢紀問其意伸叱曰慙獠此書有韓信彭越事審讀之道庠大懼遂謀亂事未及發而晟覺之乃收道庠伸下獄翌日同斬於市夷其族

邵廷瑁

廷瑁循州人幼爲黃門給事禁中言論峭直與羣闖異



及長有文武材幹博覽書史尤善騎射玠襲位爲內謁者遷內府局令總宿衛兵軍務嚴整尤重儒士有自遠方來者廷珣必先見之爲具貲糧而後引薦多被任用大寶中遷內常侍時銀春秋已長而未知稼穡荒於游宴人心危懼廷珣每從容言曰男兒十五奪父志今宗社安危繫於陛下願加檢慎銀建禹餘宮在城東南六十里山水奇絕銀避暑多往焉廷珣雅所愛尙因請解兵職願爲宮使銀從之而令典兵如故廷珣以諸戎器不甚犀利弓弩不能及遠甲鎧銷薄不可以禦大敵乃

爲式親督工匠造之累言於銀曰中國亂離久矣我先朝乘其間故有南越之地五十年來嶺表無事師之耳目不識旗鼓今中國已有真主陛下未嘗遣一介之使馳咫尺之書珠貝犀象璫瑁翠羽積於內府歲久而不一用陛下未嘗以修聘一旦兵至何以禦之銀懵然不以爲慮七年王師克郴州招討使暨彥贇戰死王師乘勝取連州銀始懼乃加廷珣開府儀同三司東南面招討使以舟師屯浣口王師旣退廷珣撫循將士招輯亡叛境上肅然稱爲良將因繕治甲兵親加訓練將復郴

連會同列者嫉之投匿名書言廷瑁將圖不軌張信之遣使賜廷瑁死士卒排軍門爭入對使者哀訴言廷瑁無反狀請加考驗弗許軍民冤痛爲立廟於洗口至今祀之

潘崇徹

崇徹南海人事龔爲內侍省局丞頗知書有鈐畧乾和中晟遣崇徹率兵攻郴州時江南將邊鎬據湖南發兵來援相遇於宜章崇徹令部將康崇保分兵爲兩翼以掩賊江南兵大敗遂克郴州明年潭州節度使王逵率

兵五萬來復郴州晟遣崇徹領衆赴之與逵遇於壕石逵軍遠來罷乏不成列崇徹登壕而望喜曰此成擒也乃縱兵擊之潭人大敗逵僅以身免桂州吳懷恩爲部下所殺遣崇徹代領其衆加西北面招討使歲餘以飛語見疑於張遣崇岳來覘其軍戒之曰崇徹果有異志卽就誅之崇岳至崇徹知其意悉以所部兵自衛以見崇岳不敢發還以白張曰崇徹日夕領伶官百餘輩並衣錦繡吹玉笛爲長夜之譟不恤軍政張方怒命崇徹單騎來歸束身請罪張釋而不問但奪其兵柄自是常

快快及王師圍賀州刺史陳守忠告急於鋹召大臣議  
皆請以崇徹領兵以拒王師崇徹難之辭以目疾鋹怒  
曰何須崇徹伍彥柔獨無方畧耶乃以彥柔代領其衆  
彥柔至賀州爲王師所擒賀州陷鋹憂迫計無所出乃  
加崇徹內太師馬步軍都統領衆三萬屯賀江會王師  
徑趨昭州崇徹但擁衆自保不爲之援王師度馬徑崇  
徹請降從鋹歸朝太祖知其事特散崇徹以爲汝州別  
駕卒

郭崇岳

崇岳番禺人宮媪梁鸞真之養子也幼爲閩人以慧黠  
聞乾和中爲內侍監鋹襲位遷內侍中太微宮使大寶  
十三年王師來伐都統李承渥以全師出韶陽爲王師  
所敗鋹震駭顧諸將無可使者鸞真卽薦其子可用乃  
以爲招討使與大將植廷曉統泉六萬守馬逕去番禺  
裁百餘里時王師已過瀧頭翌日人馬逕去我寨十里  
游騎據雙女山直瞰我軍頻摩壘挑戰崇岳本無將材  
所統之衆皆韶英敗卒絕無鬪志廷曉欲出戰崇岳不  
從但堅壁自守晝夜禱祠鬼神而已王師繼至廷曉謂

九國志卷九  
宗岳曰北師乘席卷之勢其鋒不易當也吾士旅雖眾然皆傷痍舊卒今不驅策而前將坐受其斃亡無日矣於是領前軍據水而陣令宗岳殿後禦其奔衝既而王師濟水廷曉力戰而死宗岳奔入營王師攻之初一夕南風甚厲至是北風大起王師縱火燒寨宗岳大敗死於亂尸之下

九國志卷九終

九國志卷十

宋 路 振 撰

閩司空以唐景福二年有泉汀五州地爲節度使至天德帝天德三年滅於南唐歷七主凡五十三年司空姓王名潮字信臣光州固始人唐末爲縣佐史與弟審邦審知以才氣知名號三龍屠者王緒聚眾自稱將軍署潮爲軍正既誅緒眾推爲主時光啓三年八月也至景福二年盡有泉汀五州之地九月戊戌唐以爲福建觀察使三年九月庚辰升福建爲威武

軍拜節度四年十二月丁未薨贈司空

太祖名審知字信通潮季弟景福四年冬潮有疾託審知以大事既卒自爲留後光化元年三月己丑受朝命十月癸卯授本軍節度使天祐元年四月封瑯琊王梁開平三年四月封閩王後唐同光二年十二月辛未薨在位二十九年年六十四諡曰忠懿龍啓初追諡昭武孝皇帝廟號太祖陵曰宣陵嗣主名延翰字子逸審知長子初審知寢疾命權知軍府既卒自爲留後同光四年三月辛酉唐授爲節度

使明宗天成元年十月己丑建國曰閩稱王十二月辛卯遇弒

惠宗名鱗初名延鈞審知次子建州刺史王延稟審知養子也既與延鈞弒延翰推爲留後天成二年五月癸丑唐以爲節度使封瑯琊王三年七月戊辰進封閩王長興四年正月稱帝改元凡改元二龍啓二年永和元年十月庚辰遇弒共在位十年諡曰齊肅明孝皇帝廟號惠宗

康宗名繼鵬鱗長子既弒鱗明日辛巳卽位更名昶既

而稱節度使奉表於唐明年改元通文四年閏七月  
辛巳夜控辰控鶴二都兵作亂比明遇弒永隆諡曰  
聖神英睿文明廣武應道大宏孝皇帝廟號康宗  
景宗名義初名延義審知第二十八子先是被幽私第  
及繼鵬遇弒控鶴軍使連重遇等迎立自稱節度使  
閩國王時通文四年閏七月壬午也是月改爲永隆  
元年又奉表於晉在國仍用天子制六年正月乙酉  
爲朱文進連重遇等所弒諡曰睿文廣武明聖元德  
隆道大孝皇帝廟號景宗

天德帝名延政延義弟也延義既立封爲富沙王繼昌  
延義肆爲酷虐貽書切諫遂成讐敵久之自立爲帝  
以建州開國號曰殷改永隆五年爲天德元年二年  
三月朱文進弒延義延政討之十二月衆殺朱文進  
連重遇於天德三年正月迎延政爲帝復號曰閩是  
年八月丁亥唐兵破建州出降時晉開運二年爲唐  
保大三年也保大五年唐封爲鄱陽王九年徙封光  
山王未幾薨贈福王諡恭懿

閩

黃仁諷

仁諷建州浦城人少有武幹隸本城爲鄉兵以陣敵立功累遷飛捷指揮使福州林仁翰殺連重遇送首於建安迎延政歸玉閩中時唐兵壓境不果行遣仁諷護送從子繼昌入守閩中以仁諷爲福州在城鎮遇使繼昌庸懦無馭下才人以不安會江南兵逼建安將吏知其必破上下思亂仁諷因之遂與李仁達等同謀殺繼昌而自立延政大怒收仁諷妻子戮於市發兵討之時仁達已推立卓儼明令仁諷爲城西門軍帥以捍

建兵仁諷知妻子已戮臨敵不顧出入奮擊建軍大敗退而謂繼珣曰忠信仁義士之所守舍此無以立吾頃在建安嘗攻伐今見利忘義不能慎守晚節是不忠也富沙託子於我曾不營救中道而變是無信也與建軍對敵所殺者皆鄉曲故人不仁也棄妻子使爲魚肉是不義也此身十沉九浮且夕歸地下何面目見之因拊膺而哭繼珣曰大丈夫殺身徇名何顧妻子且置是事無輕泄也建軍旣退左右以其言白仁達翌日擒斬之并殺繼珣

許文稹

文稹泉州同安人少事審知為給事使累歷內職昶襲位遷文思院使延義立改金吾使率兵屯臨汀未幾授汀州刺史朱文進竊位以其黨黃紹頗守泉南而臨汀亦叛以應文進留從效殺紹頗以其首送建安文稹怒乃諭都人歸歎於延政加大尉兼侍中為治嚴整賞罰必當吏民畏而愛之江南兵圍建州遣將時厚卿分兵攻汀州文稹率眾拒戰擒厚卿遣歸金陵因上表謝罪及建州陷明年文稹率軍吏赴金陵璟復以為汀州刺

史未幾改蘄州召歸授建州刺史周顯德中王師圍壽春潘承祐薦文稹有武幹璟令統兵數萬屯紫金山為周師所破擒文稹世宗釋不誅璟割地歸歎世宗放文稹歸璟以其失律不復用歸同安坎壈而卒

王仁達

仁達延鈞從子也幼聰悟博覽羣書及長魁梧有機畧善用鑊槊每擐甲持槊上馬馳刺觀者稱其妙延鈞襲位仁達為樓船指揮使王延稟叛與其子繼雄領兵攻福州仁達率舟師禦之偽立白幟請降繼雄登舟與語



因刺殺之以首示延稟大慟士卒擾亂遂擊破其軍擒  
延稟以獻遷親從都指揮使領台州刺史性慷慨自以  
功高又居親衛言事頗肆曾臆延鈞忌之一日延鈞宴  
羣臣酒酣顧謂仁達曰趙高指鹿爲馬以愚二世其理  
安在仁達對曰秦二世幼冲爲強臣所蔽故有此弊今  
朝中官吏不滿百人長短美惡陛下皆見之動息飲啄  
陛下皆知之敢有蒙蔽聰明擅作威福召族滅之禍者  
耶延鈞大慙因賜金帛以慰之翌日加檢校太傅自是  
延鈞每醉卽欲殺仁達私謂所親曰仁達多智畧當吾

之世猶可駕馭觀其詞氣非幼主臣也後竟誣以叛誅  
之

### 楊思恭

思恭建州建陽人少俊爽好學有心計事昶爲同安尉  
延政聞其名辟爲節度巡官及襲位遷戶部尙書時兵  
革屢興國力空匱命思恭爲僕射錄國事增山澤墾畝  
之稅魚鹽蔬果皆倍其算道路側目號楊剝皮唐兵至  
建陽延政遣統軍陳望帥衆拒之列寨相屬斥埃甚明  
唐人不敢逼凡月餘不戰思恭遣使以延政之命詰責

之望對曰江淮間多積兵將帥練習戰事未可輕敵陛下不以臣不肖舉國中之衆以屬於臣安危之機在此一決今之曠師非臣之怯也且欲觀其變爲萬全之策耳思恭大怒復遣讓之曰淮兵侵陵百姓叛逆睡不交睫食不知味且彼之衆不過數千跋涉山川師無停糧將軍擁衆盈萬兵精馬壯今乘危授隙與之角戰是以石破卵也若曠日持久使其營壘堅固芻粟豐備復何望哉將軍受國重恩宜盡死力立功立事以報萬一江淮懼而自退將軍無血刃之勞何面目見陛下乎望不

得已乃引兵渡水唐人張左右翼以擊我軍大敗溺死者尤衆延政降思恭遂歸金陵斬於建康市

留從效

從效泉州桃林人少隸本城爲衙兵征臨汀以功遷冗員指揮使朱文進殺延義竊據福州以其黨黃紹頗爲泉州刺史從效與其裨校王忠順董思安謀同殺紹頗迎立王繼勳爲刺史從效自署爲平賊統軍俄而文進率兵來攻從效開城門與戰文進敗走於是人心悉歸於從效會江南兵已平建州從效遂刼繼勳送於金陵

李璟以從效爲清源軍節度使發兵屯郡中一日從效謂屯將曰此一方東漸於海與福州世爲讐敵南限廣州瘴癘之地人使不通西連鄞水皆猿徑鳥道近歲干戈屢動三農廢業冬征夏斂僅足自贍不煩大軍久駐於此屯將皆不對翌日置酒餞之郊外屯將不得已皆卷旗而去從效遂有漳泉之地李璟不能制累授從效同平章事兼侍中封晉江王從效起自行陣知人疾苦勤儉養民常衣布素涉獵史傳延納名士部內清治吏民愛之王氏有二女嫁爲郡人妻從效每給其衣食歲

取進士明經謂之秋堂周世宗征淮南從效遣衙將蔡仲興爲商人以帛書置革帶中由岳鄂送欵內附又請置邸京師世宗以其素附江南恐其非使不許宋朝建隆初上表稱藩李璟遷於洪州從效遣使假道吳越入貢太祖遣使賜詔書以慰之未至而衙校張漢思陳洪進劫從效遷於東亭漢思自稱留後從效疽發背卒

王忠順 黃思安

忠順泉州人隸本城爲鄉軍與從效同殺黃紹頗遷爲軍校江南兵禍建州黃思安與忠順同領衆赴難延政

屯西門數戰不利延政諭之曰孤以不德致寇公等與從效首誅兇黨克定泉南踰越巖險以兵來援見公等之忠赤也今當勉之思安等俯伏對曰臣以必死奉報時城中衆心離散或說以去就之計思安曰吾輩世爲王氏臣今視其危而叛去天下皆皆有容我者乎衆感其言遂無叛者翌日城陷忠順力戰死之思安整衆歸泉州追兵不敢逼

陳洪進

洪進泉州仙游人少材勇選爲州兵留從效殺紹顛遷

爲指揮使從效將送紹顛首於建安迎延政爲閩王羣下以道阻賊盛莫有肯行者獨洪進請往時尤溪賊數千衆遮道不得前洪進神氣自若語賊曰朱福州已爲義師所襲殺之矣爾輩更爲何人戍守卽持紹顛首示之曰我倍道兼送之建州以嗣君返國爾等無所歸矣賊遂潰散渠帥數人皆聽命因從洪進至建州延政大悅擢洪進爲建州馬步軍都指揮使及江南克建州延政歸金陵李璟以留從效爲清源軍節度使洪進佐之出戰入守十五年餘以功遷統軍使從效卒其子紹鏐

使江南未復小子紹鑑領留後事月餘吳越遣使來聘  
紹鑑夜召其使與之宴語洪進疑之乃誣紹鑑謀叛欲  
以其地入吳越執之送於建康推副使張漢思爲留後  
自爲副使漢思老且淳謹事無巨細皆決於洪進漢思  
諸子患洪進之專因大宴伏甲府署中將殺洪進酒數  
行地忽大震屋宇皆傾動甲未及發而同謀者告之洪  
進遽起去洪進子文顯文顯俱爲牙校請以所部兵擊  
之洪進不許一日洪進置大鎖於袖從子常服安步以  
入府中漢思方處閣內洪進自外鎖其門中使人叩門

謂漢思曰郡中軍吏以公耄荒不能治請洪進知郡事  
衆情不可遏望以郡印相授漢思錯迕不知所爲乃以  
印與之洪進出召將吏告之曰漢思昏耄不能治事以  
印見授矣將吏皆賀卽日置漢思於別館以兵監守之  
遣使如江南請命李煜以洪進爲清源軍節度使建隆  
初太祖平李重進於揚州江浙皆納欵洪進懼乃遣牙  
校奉表自稱副使言張漢思請老歸第以已領軍事太  
祖賜詔書慰諭乾德二年刺授平海軍節度使仍鑄印  
以賜開寶八年江南平洪進遣其子文顯來朝貢因降

九國志卷十一  
詔洪進入覲至建州聞太祖崩乃還鎮發哀太宗卽位  
加檢校太師太平興國二年入朝遂獻所管漳泉二州  
之地願朝請加平章事卒年七十二贈中書令諡曰順

九國志卷十一 終

九國志卷十一

宋 路 振 撰

楚武穆王於唐乾寧三年丙辰自立於湖南至後唐保  
大九年辛亥國滅凡五十七年  
武穆王姓馬名殷字霸圖唐中和時孫儒劉建鋒戍蔡  
州殷隸軍中及儒敗死衆推建鋒爲帥殷爲先鋒建  
鋒被殺衆推張佶佶讓於殷時乾寧三年五月也九  
月唐授殷潭州刺史光化元年三月命知武安軍留  
後未幾進本軍節度使梁開平元年四月辛未封楚

王後唐天成二年六月封楚國王許自開國長興元年十一月己巳薨年七十九諡武穆葬於衡陽之上黃

衡陽王名希聲字若訥殷次子殷有子數十人嫡子希振長而賢次希聲與希範同日生以母寵得立長興元年十一月丙戌襲位去建國制十二月唐以爲節度使三年七月辛卯薨追封衡陽王  
文昭王名希範字寶規殷第四子希聲既沒長興三年八月辛酉襲位九月唐以爲節度使四年正月乙卯

封扶風郡侯應順元年正月壬辰封楚王晉天福四年四月加天策上將軍十一月開天策府開運四年五月壬辰薨年四十九諡文昭是年六月劉知遠改國號曰漢

廢王名希廣希範同母弟希範病以希廣屬拓跋恆將佐以希萼爲長恆以勸希廣讓希萼指揮使劉彥瑫等不欲遂奉希廣權軍府事時越希範薨之四月乙未也七月甲午漢封爲楚王十月希萼來奔喪拒之遂構兵乾祐三年十一月希萼陷長沙戊申被害葬

瀏陽門外

恭孝王名希萼殷第三十子既害希廣遂自爲楚王時漢乾祐三年爲南唐保大八年十一月丁未也保大九年二月入貢於唐三月唐以爲楚王九月戊寅同母弟希崇指揮使徐威作亂執希萼幽於衡山縣希崇既襲位國人不附復立希萼爲衡山王希崇求援於唐唐命邊鎬將兵趨長沙十月鎬入醴陵遂趨希崇入朝十一月辛酉盡遷於唐辛未鎬遣先鋒李承戩將兵如衡山趨希萼入唐十二月唐仍賜希萼爵

楚王以希崇爲節度使數年希萼薨於金陵諡恭孝希崇率兄弟十七人奔於周

張佖

佖京兆長安人少通經史咸通初以明經中第累遷宣州從事秦彥牧宣城陰養亡命將圖江淮而兇暴多忌不爲吏民所信佖慮其害已乃辭疾去職將歸京師至汝陽值秦宗權阻兵佖往依之宗權與語大悅署爲行軍司馬會宗權叛遣衆四出屢爲梁祖所破佖謂劉建鋒曰今天下方亂英豪角逐吾觀秦公剛鷲猜忍終不



能濟大事梁王軍政精明將士悉力一旦全師奄至吾等無類矣不如早自爲謀建鋒孫儒俱從儒殺宗衡自領其衆以佶爲行軍號令嚴肅衆皆憚之及破楊行密佶有力焉行密逐趙鐸據宣州儒與建鋒領衆西上將討行密建鋒謂佶曰今與孫公權全軍爲公刷耻於宣州如何佶唯唯謝之於是儒盡焚維揚積聚驅其民人大屯廣德將先平行密而後北渡及圍宣州糧道阻絕士卒大疫乃爲行密所破佶與建鋒率餘衆據湖南推建鋒爲帥建鋒多私狎每飲酒部曲間有長直兵陳瞻

者其妻有殊色建鋒通之瞻怒以鐵槌置袖中擊殺建鋒建鋒將吏推佶爲帥佶將入府常所乘馬忽蹉嚙不止正中佶髀仆地不能起者久之時殷征蔣勛於邵州佶謂其將吏曰吾非汝主當迎馬公爲之於是礮陳瞻於東市遣姚彥章等逆殷及殷至佶乘肩輿入府受其拜謁訖命殷升廳佶卽降階率將吏拜賀請代殷攻邵州梁開平中奏授佶朗州永平軍節度使累遷檢校太保同平章事乾化初移鎮桂林卒於治所子少敵有武畧事殷爲軍校希範襲位遷永州刺史天福中卒

許德勳

德勳蔡州朗山人少爲縣吏好讀書史任氣不羣秦宗權據淮西德勳往依之擢爲左軍判官與殷同在帳下有州里之舊情好歛洽從孫儒討揚州以德勳爲蹋白都指揮使時淮上饑饉德勳所至必先固困廩以待儒謂左右曰成吾事者許蹋白也自是軍中謀議皆得預焉及儒敗於宣城與劉建鋒同入湖南以軍功奏授檢校太傅兼侍中殷代王以德勳爲內外馬步軍都指揮使乾寧四年淮南楊行密遣使來通好以梁祖擅朝政

願與殷爲兄弟之國以絕梁殷欲許之德勳諫曰行密盜據淮甸抗衡中國明公義修職貢於朝爲附庸一旦棄之前功盡廢他日朝廷問罪江表以我爲同惡卽王師先至湖上矣不如拒絕之乃心王室久長之策也殷從之天復中淮人攻鄂杜洪求救於朝廷詔發荆湖澧朗兵以援之殷遣德勳與秦彥暉率舟師東下時荆南成汭知梁祖將篡曲意事之乃自擁衆乘巨艦直抵夏口爲淮人所敗汭溺死德勳遂與朗州雷彥恭襲破荆南盡俘其府實及士女伶倫工巧之徒凡數千人以歸

天祐二年又領兵畧地荆南還經岳州刺史鄧進忠以城歸附遷岳州刺史梁開平初淮將冷業寇平江以德勳爲東面行營步軍都指揮使去淮軍五里下營業以遊騎偵邏晝夜不絕德勳選習水者五十人斬木取其枝葉戴之各持長刀浮江而下夜犯業營令舉火爲號俄而營中擾亂自相蹂藉火舉德勳以勁兵奄至大敗淮軍斬首千餘級擒業及裨將二十餘人以歸天成中淮將王彥章苗倫等寇岳州舟師萬餘人蔽江而下屯君山側殷遣德勳率艨艟戰艦千艘以禦之德勳謂諸

將曰淮人遠來掩吾不備今若以全師臨之必懼而遁矣乃潛師屯角子湖偃旗臥鼓夜遣裨將王環以戰艦二百斷楊林浦絕其歸路淮人覺之遲明淮人移軍荆江口將會荆南兵合攻岳陽德勳選輕艦三百令裨將詹信先襲淮人且行且戰德勳擁艨艟自後而至大戰荆江中淮人大敗斬首千餘級溺死者甚衆擒彥章及倫以歸而行密遣使來行成且請二將殷以禮歸之遣德勳餞彥章等德勳謂之曰楚國雖小舊臣宿將尙在願公此歸勿以湖南爲念若須得志當待馬子爭草然

後可圖也彥章等媿謝而去是後馬氏諸子果爭立爲江南所滅人以德勳爲知言天成二年殷建國拜右相卒年七十餘子可瓊

鄧進忠

進忠湘陰人世爲土豪兄進思唐中和初爲瀏陽鎮將黃巢之亂江湖荒饑進思陰養死士千人以防寇盜會巢弟黃浩領惡少數千剽劫江左號浪岩軍轉入湖外大掠瀏陽進思患之乃與進忠謀率壯士伏山塚間候浩軍半過橫出擊之浩軍大敗前後皆遁走浩僅以身

免縣以事聞於州奏授進思嶽州刺史天復中進思率進忠襲位天祐二年許德勳襲京南同出戰艦臨其城進忠遣人獻牛酒開門納德勳大亨將士德勳諭以禍福翌日舉族南歸長沙賜進忠鞍馬繒帛金銀器令權知衡州軍州事未幾奏授刺史同光中卒

姚彥章

彥章字繼徽汝南人少倜儻有武畧乾符中黃巢盜起秦宗權召募豪俊以彥章隸帳下善用鐵槊重百餘斤每上馬盤辟疾如旋風觀者壯之隨孫儒渡淮拔廣陵

儒死宣城隨劉建鋒入湖南領廳直軍最被親信及建  
鋒遇害張佶傷髀不能視事佶與彥章首議迎殷遂遣  
彥章率所部逆殷於邵州殷初疑之猶豫未卽還彥章  
入白殷曰劉龍驤張行軍與足下同功一體之人也不  
幸龍驤有不測之禍行軍以髀病廢是天意人望歸於  
足下何遽疑也殷釋然遂令彥章統衆先歸國內既定  
翌日殷至代立以功遷長直都指揮使彥章建議平嶺  
北七州薦李瓊爲游奕使桂州平奏授靜江軍行軍司  
馬監軍府事遷檢校工部尙書橫州刺史容南龐巨昭

歸欵彥章率兵迎之遷寧遠軍節度副使知容州事殷  
建國拜左相遷昭順軍節度使清泰中加兼侍中卒

### 秦彥暉

彥暉上蔡人宗權之族弟父轍仕郡爲牙校彥暉少佻  
勇有智畧宗權將敗族人懼禍彥暉請隨族兄宗衡討  
揚州宗衡爲儒所害彥暉從儒攻宣州儒敗又從劉建  
鋒入湖南爲捉生指揮使光化中殷將平嶺北以彥暉  
及李瓊爲七州游奕使率兵平桂林虜劉士政以功奏  
遷檢校太保天祐末淮將劉存劉威領戰棹攻湖南殷

以彥暉爲在城都指揮使領兵三萬以禦之彥暉潛艘  
艫於上流以待淮人又遣副指揮使黃璠分戰棹三百  
艘潛瀏陽口存以舟師至越隄屢戰不利乃遣使送書  
於殷以請和殷欲許之彥暉曰淮人多詐將緩我師而  
爲變不可信也使者回以其言白存時彥暉與存對水  
爲陣存登岸遙呼彥暉曰我降矣而公弗許古人有言  
殺降不祥公豈不爲子孫計彥暉怒曰賊踞吾城下而  
不擊奚顧子孫耶乃鼓譟齊進淮人遁走黃璠自瀏陽  
口列戰艦橫絕大江合擊之淮人大敗擒劉存至夕劉

威以輕舸遁去彥暉親戮其裨校百餘人以功奏加檢  
校太傅開平三年領兵攻朗州殺其將區景思擒節度  
使雷彥恭及其宗屬雷彥雄等七人以歸朗州平遷道  
州刺史乾化中代歸卒

王環

環許州人少隸忠武軍秦宗權據淮西以環有勇力召  
置帳下後與劉建鋒從孫儒渡淮儒死宣城又隨建鋒  
入湖南爲捉生指揮使剽畧郡邑先登陷陣衆推其果  
毅建鋒死殷代立遷水軍都指揮使畧地上高擒淮將

劉靖奏授檢校司徒真明初徙岳州刺史許德勳以舟師巡境上夜中南風暴起環乘風鼓棹直抵齊安城中纔四鼓矣環挂繩梯登城殺守卒十餘人引戰士直入州廨擒刺史馬鄴遲明城中驚擾德勳乃驅其官屬將吏寘入舟中大掠而歸至纔口德勳謂環曰鄂人其邀我乎環曰我師入黃州而鄂人不覺今奄至城下迅雷不及掩耳當自救無暇安能邀我乃展旗鳴鼓成列而行鄂人不敢出至岳陽以所俘獻殷大喜奏以環領黃州刺史天成初史光憲自京師還爲荆南高季昌所執

奪明宗所賜名馬妓女殷遣環與袁詮詹信率戰艦三百艘討之大畧於境上季昌遣將屯劉郎狀環進兵擊破之奪戰艦百餘艘遂逼荆渚季昌懼請和取光憲以歸殷建國以環爲左六軍副使長興二年卒環善治舟師能以寡擊衆布衣糲食與士卒同甘苦每戰罷必盡索傷者扶至帳前手自療治之鍼鈎鈐夾名膏上藥常置坐右殷每部分諸將使之出征士卒得隸環麾下者咸相賀曰吾輩不畏死但獲居王六軍隊伍中足矣其爲士卒所愛如此

王贊

贊事希範爲衡山指揮使時十五餘年境內無事但以所部營飾宮室剋修佛廟而已贊求自試乃以爲岳州刺史乾祐初希萼率兵攻湖南希廣以贊爲都部署率衆禦之敗朗軍於僕射洲奪戰艦三百艘希萼奔歸武陵密遣人以珍幣通好於贊贊拒而不答三年希萼復大舉兵攻長沙路由岳陽贊堅壁自守希萼不敢逼遣人謂贊曰比約與君同行今何異心也贊曰大王兄弟尚不相容何責將吏之異心也願大王入長沙無傷同

氣臣守岳陽敢不盡臣節希萼感其言及篡位奏授贊永州防禦使淮將邊鎬據湖南有占者云王氏繼馬氏時議以贊有世功當應其讖鎬白於李璟乃授贊鎮南軍節度使賜襲衣巾帶以毒冥巾帽中未幾贊腦裂而卒

李瓊

瓊蔡州汝陽人少以翹勇選隸秦宗權帳下後隨孫儒渡淮儒敗又從劉建鋒入湖南爲親從都裨校殷代立遷本軍指揮使時湖外初霸王宇未廣議者復請窺取



嶺北七州之地乃命瓊與秦彥暉爲七州游奕使張國英李唐爲之副兵克永道郴連四州因水陸齊進屯全義嶺時桂州劉士政遣副使陳可璠營嶺下指揮使王建武營秦城以拒我師彥暉三戰不利會全義民請爲鄉導瓊詰之對曰此去西南有古路背巖闕抵秦城五十里雖生荆棘可通單騎瓊乃白彥暉請以步卒三百騎兵六十以巨槩長劍銜枚夜襲秦城至建武營纔三鼓矣時營中士卒不虞我師之至皆熟寢令騎兵分布柵外自以牛革蒙柵門踰入士卒隨之營中亂自相蹂

躪斬首百餘級衆遁走擒建武而歸遲明至大寨係建武以素練示可璠營中可璠不知我師已破秦城秦猶鼓譟未信乃斬建武投首營中士卒震駭彥暉因其驚擾以全軍擊破之擒可璠降其將吏二千餘人欲部送歸湖南瓊曰我以七千人討桂林若分兵以送降者前有大敵何以當之此敗軍烏雜其心不一不如殺之以全軍直趨桂林此席卷之勢也於是盡坑降兵自秦城以南猶有二十餘柵皆迎風而潰瓊以先鋒兵躡之比至桂林殺戮萬計遂圍其城九日而士政降彥暉班師

殷以瓊爲桂州刺史令經畧嶺南遂襲容州降龐巨昭  
明年又與呂師周克昭賀梧三州瓊魁岸多力每食肉  
十餘斤踞案大嚼眈眈然軍中號曰李大蟲先是桂林  
兒童聚戲衢路中忽相驚走曰大蟲來大蟲來至是果  
應瓊治桂州三年招納通遁法令寬簡吏民便之開平  
中卒於治所年六十八

呂師周

師周廣林人吳將蒙之裔孫也父珂少以勇敢隸楊行  
密帳下累戰有功遷黑雲都指揮使師周少勇敢任氣

隨父征討臨陣未嘗介甲金創被體而談笑自若衆皆  
服其果毅珂卒行密令代其父爲指揮使天祐初副指  
揮使綦母章以所部兵屯上高與湖南爲敵境累戰殺  
傷者萬餘人遷袁州刺史師周性豪率頗通緯候及兵  
書自言世將家子不可保富貴每恣爲杯酌狎客常十  
餘醉必起舞或擊節狂歌慷慨泣下行密聞而疑之密  
遣人偵其動靜師周不自安乃謀於綦母章曰吾與湖  
南對壘有日矣觀其營上雲飛常紛紛然未易敗也馬  
公寬仁待士有禮吾欲逃死焉公以爲如何章曰公自

圖之章舌可斷而言不洩也乃遣牙將呂蔚通欵於我  
開平初以所部兵大獵境上因歸於湖南章縱其親隨  
之人殷聞師周至甚喜曰吾方圖嶺表得師周足矣卽  
以爲步軍都指揮使領袁州刺史明年率兵攻昭賀梧  
蒙龔富等州與劉隱兵十餘戰而克之奏授韶州刺史  
乾化中領兵破飛山蠻斬其帥潘全盛諸蠻悉歸欵奏  
遷檢校太傅清秦中卒

廖光齊

光齊有武幹事殷爲決勝副指揮使天成未從許德勳

討荆南屯兵沙頭高季昌之子從嗣爲雲猛指揮使驍  
勇無敵一日單騎薄德勳營衆不敢出光齊怒言於德  
勳曰此驂也請爲公擒之乃介馬援槍而出與從嗣格  
鬪良久光齊僞墮馬從嗣奪槌以擊之反爲光齊所擒  
時季昌以數十騎觀於臺上見其子被擒亟令騎士來  
請及入營光齊已拉殺之矣季昌大慟翌日遣使請成  
光齊以功遷決勝指揮使性簡傲使酒因爭飲令毆同  
列黜爲邵州教練使未幾復舊職討溪州蠻中流矢而  
卒

彭玕

玕吉州廬陵人世居赤石洞爲酋豪黃巢之後江表寇盜蜂起玕於鄉里保聚徒衆得數千人自爲首領捕逐羣盜有功本州補玕永新制置使玕雅好儒學精左氏春秋當兵荒之歲所在饑饉玕延接文士曾無虛日治具勤厚人多歸之廣陵筆工李鬱者善爲詩什玕嘗貽書於鬱以白金十兩市一筆又令鬱訪石本五經卷以白金百兩爲直廣陵人相謂曰玕以十金易一筆百金酬一卷况得士乎於是蕭謨等數人咸往依之鍾傅據

江西其裨將韓德師叛傅令其弟城攻破之斬獲甚衆軍政嚴肅樵採不犯傅以城爲吉州刺史未幾以玕代之玕以傅爲輔車之勢會傅死楊行密將攻破豫章虜鍾匡時玕懼將圖據湖南先遣其黨敖瞻李緒來致書於殷且覘殷之起居殷勞之翌日大宴府中將吏畢集以瞻爲上客瞻等歸以語玕曰馬公龍髯鳳眸大人之表其將吏輯睦少長有禮未可圖也玕默然開平中撫州危全諷率袁吉之兵以復豫章至象牙潭淮將周平擊破之玕乃以所部并其族千餘人歸歛於我殷發兵

九國志卷十一  
三  
境上援其輜重至卽奏授郴州刺史隴西郡公以希範  
聘玕女天成中玕卒年七十三兄鄴弟瑛子繼英繼勳

劉昌魯

昌魯字安國相州鄴縣人唐末明經登第釋褐項城主  
簿累遷至尙書郎乾符中出爲高州刺史黃巢寇嶺南  
郡縣離析昌魯使其居民據保障以自守一境獲安就  
遷防禦使劉隱入廣州遣其弟龔領兵攻高州昌魯率  
勵丁壯逆戰於城外大破龔軍自以地小力寡終慮爲  
隱所吞開平初乃致書於殷曰僕昔占籍鄴中受恩唐

室蒞高三歲遏黃巢之亂收合生齒堡於涼山因深爲  
塹憑高作壘攻苦食淡以勸士率洎盜賊平定一境獨  
全高涼之民至今相戴而中原多故嶺南不賓劉隱亂  
常僭興師律舉蠻貊之衆成吞噬之心僕嘗訓勵甲兵  
躬當矢石掃壘一戰劉巖遁走雖仗義者必勝恃力者  
必亡然而山越之人瘡痍衆矣殘民以逞所不忍爲昔  
古公去幽寶融歸漢千古之下迭爲推美僕雖顛愚景  
慕前烈竊惟明公負江湖之固有桓文之業土宇至廣  
仁風素厚願以所部歸欵於執事謹刺血染翰上達誠

惻惟明公圖之殷覽書甚喜卽遣指揮使張球率兵迎之昌魯盡輦其帑庫及士卒千餘人歸於湖南奏授永順軍節度副使兼行軍司馬天成中卒

鄧處訥

處訥邵州龍潭人少爲州兵累遷至軍校唐乾符中從閔頊征蠻於安南黃巢之亂盜殺潭州觀察使李巢城中無主會頊自安南回以所部兵駐郡中傳檄諸州同捍寇盜境內以安遣使奉表於朝詔以頊爲檢校右僕射欽化軍節度使潭州刺史處訥從頊久在安南及是

欲歸邵州省其親族頊回署處訥爲邵州兵馬留後未幾衡州刺史周嶽舉兵襲頊殺之因據長沙處訥縞素發哀召集將吏諭之曰閔僕射駐軍長沙親捍寇盜布衣糲食以養士卒救民於塗炭恩德厚矣不幸爲鼠輩所圖今欲與諸軍問罪於周嶽可乎衆皆曰留後爲善人雪冤敢不從命乃以精卒二千襲嶽殺之梟首於東市遂據其城慰撫將吏中外胥悅時景福二年也旣而州人以狀聞於朝廷詔以處訥爲湖南節度兵馬留後乾寧元年劉建鋒領衆自豫章處訥遣其鄉豪首蔣勛

等領兵卒三千斷龍回關殷先至關召勛等諭以禍福仍許奏授官秩勛衆皆喜是夕乃棄鎧甲旗幟潰邵州明日建鋒令前鋒兵盡被邵軍鎧甲張旗幟直趨潭州薄城東門守陴者不之覺且謂邵軍之回也門啓前鋒兵徑趨府中將吏驚走是日處訥內宴集寮屬而無備禦裨將宋全節就擒處訥斬於長史橋側

龐巨昭

巨昭不知何許人唐末爲容州觀察使精天文緯候之學黃巢入廣南巨昭括部內諸蠻得數千人親自選練

分屯險隘巢寇憚之不敢犯其境以功加寧遠軍節度使開平初高州劉昌魯率衆歸附殷遣姚彥章李瓊率兵迎之長驅而南前鋒至容州巨昭將歸欵於我乃大享將士而謂之曰李瓊甲馬雄盛乘席卷之勢必來侵我何策以禦之裨將莫彥昭對曰瓊軍遠來士卒疲乏請盡徹儲糧潛兵山谷空城以待之瓊至當據吾城外無救援我以全師掩其不備浹旬之間瓊可擒也巨昭曰吾觀楚氛甚銳未易破也不如以牛酒犒其軍爾輩不失爲富家翁足矣彥昭不從巨昭殺之迎勞瓊瓊以

九國志卷十一  
軍徑赴城中俄而廣南劉隱率衆來我師不能守於是  
盡輦其府實驅其人民以歸巨昭挈其族數百口隨歸  
長沙殷久聞巨昭之名遣使慰勞卽日奏授檢校太傅  
領容管經畧使巨昭在嶺南嘗占翼軫間有善星因謂  
所親曰劉隱兄弟不道殘害良善吾終當逃難於長沙  
至是果歸附人或問湖南與淮南國祚長短巨昭曰吾  
入境來聞童謠曰三羊五馬馬子離羣羊子無舍自今  
以往馬氏當五主楊氏當三主後皆如其言真明中卒  
年七十六

彭師曷

師曷溪州人世爲諸蠻酋長父士懋唐末溪州刺史其  
地西接牂牁羽林南抵桂林象郡東北控澧朗方數千  
里山水險惡舟車不能通其蠻有六種盤氏爲大卽槃  
瓠之種也俗無文法約束繫於酋長當士懋之世昆弟  
強力多積聚故能誘脅諸蠻皆歸之統兵萬餘人春夏  
則營種秋冬則暴掠而長沙四境最被其惡天福五年  
士懋遣使通款於蜀且請兵同寇澧朗辰三州大略縣  
邑希範遣指揮使劉勅全師率衡山步卒五千人以救



之勅等擊敗其兵士懋遁去遂進兵襲溪州州在山頂  
爲堡四面斗絕勅選壯士緣崖梯山縛棧道以圍守之  
士懋夜舉烽火以集蠻軍勅於溪澗中置毒蠻軍至飲  
其水者皆病嘔不能戰死者甚衆一日南風暴起勅以  
火箭射堡中盡焚其廬舍蠻軍多死士懋乃率所部夜  
踰絕險遁入獎州遣師曷率諸蠻酋長田汧贊單行方  
向存祐羅君富等攜牌印納款於勅勅班師與師曷等  
歸長沙釋其罪厚賜而遣之奏授士懋溪州刺史兼溪  
洞招撫使以師曷補武安軍牙校師曷有勇力善射累

從諸將征討有功遷衡山指揮使希廣襲位改強弩指  
揮使領辰州刺史希萼舉朗州之衆以攻湖南列戰棹  
於水西軍勢甚盛師曷登城觀之白希廣曰朗人驕而  
輕雜以蠻兵其勢易破請假臣步卒三千人南自巴溪  
渡江趨嶽麓後夜擊之請令許可瓊以舟師陣於山前  
破之必矣希廣因與可瓊謀堅沮止之翌日師曷見可  
瓊於軍門坐談戰事師曷瞋目叱之曰汝反文在面卽  
日當投賊何庸論戰耶拂衣而去乃白希廣請誅可瓊  
希廣不從師曷退而歎曰禍亂如此王稔惡無斷敗亡

可待矣及朗軍攻長樂門可瓊果束甲以入於賊城陷師曷被擒希萼命釋之師曷溪洞人性獷直不喜阿附屢爲希萼以罪笞責及希崇篡立令師曷衛送希萼囚於衡山欲使殺之於路而師曷奉事彌謹終以保全因與指揮使廖偃同謀立希萼爲衡山王後隨希萼歸江南李璟聞其忠節擢爲殿直都指揮使後卒於金陵

劉言

言吉州廬陵人少事彭玕爲伍長以勇幹聞開平中玕納欵於湖南言從歸長沙希範卽玕之壻也出鎮朗州

召言爲牙校及希範襲位溪洞酋長多求欵附乃以言知辰州軍事以鎮撫諸蠻使之未幾奏授辰州刺史希萼入湖南百役繁興靜江軍指揮使王逵周行逢叛歸朗州初希萼令其子光贊爲朗州留後逵至廢之以馬希振子光惠權軍州事光惠庸懦不能馭羣下但酣嘗淫戲而已將吏患之逵等懼亂遂與行逢謀遣人往辰州請言爲副使言素知逵等兇暴謂其徒曰南方禍亂方始今若不往必加於我矣於是留書所部以單騎行逵等遂廢光惠推言權留後事時周廣順元年也言旣

立遣使詣闕上表又遣使納款於李璟求授節鉞璟未之許也會希崇逐希萼而自立請援於江南璟遣其將邊鎬率師入長沙盡俘馬氏之族歸於金陵二年冬璟又下詔召言入覲言不行因令副使王逵行軍司馬何景真指揮使張做蒲公益朱全琇宇文瓊周行逢彭萬和潘叔嗣張文表等號十指揮使同率兵攻湖南逐邊鎬鎬奔歸江南言乃以逵權知潭州軍府事遣使詣闕上表且言逐江南賊軍復馬氏土疆之意周太祖遣使來宣慰三年正月言又遣使上表以長沙經兵火焚毀

請就以朗州爲治所周太祖下詔升朗州爲大都督府在潭州桂州之上以言爲檢校太師同中書門下平章事武平軍節度使逵爲潭州刺史武安軍節度使景真爲桂州刺史靜江軍節度使指揮張傲而下並領刺史爲節度副使或行軍司馬皆言奏請之也是月又遣牙校張崇嗣置邸京師歲時修貢周祖下詔賜言舊屬湖南在京及諸處莊宅邸店時王逵爲節度使周行逢爲行軍司馬專制湖南威雄漸盛言懼其爲變將圖之逵與行逢謀先六月逵率所部兵入朗州殺言部將鄭政

收言囚於別館誣奏言與江南通謀誘引淮賊并潭朗之地以歸金陵八月周祖下詔奪言官勒歸私第委達以便宜安置復下詔令達歸治潭州乃以潘叔嗣權知朗州軍府事未幾令叔嗣殺言於武陵初民間謂爲劉齧牙馬氏將亂湖南有謠言曰馬去也不用鞭齧牙過今年及邊鎬入長沙盡俘諸馬歸金陵鎬尊爲王達所逐奔歸江南是歲言亦爲叔嗣所殺皆其驗也

王達

達朗州武陵人或名進達少以驍勇選爲靜江兵希萼

入朗州累遣討賊有功遷本軍指揮使乾祐三年希萼攻湖南令達領戰棹爲前鋒陷長沙希萼旣立達有力焉時剽掠之後城中帑庫盡以焚毀賞賜不足又重構府署執役者皆靜江士卒相與怨憤聚而謀亂副指揮使周行逢聞之以告達曰士卒怨懟深矣不早爲計難將及我是夕乃擁其衆以長柯巨斧斬關以出遂歸武陵時希萼方醉遲明始遣裨將唐翥領兵追之不及因徑趨朗州士卒皆重趼不復成列達先已入城伏卒門下翥至達縱兵擊之翥軍大敗追殺殆盡翥僅以身免

九國志卷十一  
三  
達乃逐留後馬光惠請辰州刺史劉言爲帥未幾長沙兵亂指揮使徐威等廢希萼而立其弟希崇囚希萼於衡山行軍司馬廖偃與指揮使彭師曷共立希萼於衡山王將納之希崇懼納歛於江南且請兵爲援李璟遣其將邊鎬率師入長沙盡遷馬氏之族歸於金陵璟以鎬爲武安軍節度使又遣將劉仁贍率師取岳州鎬將圖朗州密白璟請召言入覲言不行謀於達曰江南召我不往必加兵於我矣爲之奈何達曰鎬之此來以制置潭朗爲名公如東行正入其算武陵負江湖之阻帶

甲萬衆乃欲拱手臣異姓乎鎬新至長沙經畧未定乘人心憤怒引兵攻鎬可一鼓而擒也言然之乃遣與何景真等同起兵於武陵號十指揮使以攻邊鎬達率舟師南上至長沙邊鎬大駭以所部奔歸江南諸州屯守皆罷去盡復湖外之地時廣順二年冬也達遂據長沙與劉言同遣使上表於朝三年正月周祖下詔褒諭以達爲武安軍節度使達出於行陣本無鈐畧不能馭羣下時諸指揮使受詔爲節度副使者數人各留長沙各置牙兵分廳案事軍政淆亂將吏患之每宴集府中喧

叟如市達莫能禁止會廣兵乘間盡取梧桂郴連之地  
達率衆南征敗於壕石而還時何景真朱全琇同在武  
陵與劉言不協各謀爲亂言又以達專制湖南慮其難  
制將并長沙之地達大懼因與周行逢謀召景真全琇  
領兵討桂林至皆殺之又殺張傲於府中景真之姻也  
乃率所部兵襲武陵幽言於別館誣奏言欲併潭朗歸  
歟於江南周祖下詔委達以便宜處置達既殺言遂移  
治武陵時顯德元年也世宗下詔以達爲武平武安等  
軍節度使三年世宗征江南詔達爲南面行營都統以

所部兵逼鄂州攻其長山寨而還復領衆逼宜春道出  
長沙耀兵金波亭有蜜蜂集繖蓋中占者以爲不利遂  
留長沙令行營副使毛立領兵南下以潘叔嗣張大表  
爲前鋒叔嗣怒至澧陵擁衆而還達聞兵叛乃乘輕舸  
奔歸武陵叔嗣追殺之於朗州城外

周行逢

行逢武陵人少無賴與王逵同里俱爲靜江兵事希萼  
爲小校從希萼攻湖南陷長沙靜江軍叛隨逵入朗州  
破追兵於城門下殺千餘人逵攻邊鎬令行逢領步卒



親衛都指揮使彭萬和爲永州防禦使觀察判官李觀象通判軍府事釋毛立爲水軍都指揮使行逢旣得志恣行誅戮達之子弟及門將吏死者百餘輩性猜忌每遣人伺察郡縣守宰有聚飲偶語者必逮捕下獄以謀反誅宇文瓊彭萬和與行逢族兄飲酒疑其謀叛夜遣甲士圍其第盡擒殺之麾下之人皆重足脅息五年朝廷遣使儲魚監於境上行逢懼乃繕治戎器增築城壁闕諸州鄉兵大修武備皇朝建隆三年以疾卒年四十六葬武陵之肩山子保權嗣行逢性殘忍然爲治嚴整

不徇私黨躬履儉約以率羣下辟署官吏必取廉介之士條教簡約民甚便之有女壻求補吏不許給以耒耜而語之曰吏所以治民也汝才不能任職豈敢私汝以祿姑歸墾田以自治也其妻嚴氏不入府署躬率奴僕耕織以給賦調人民化之率務稼穡四五年間倉廩充實尤崇信釋氏常設大會齋緇徒畢集行逢徧拜之捧椀執悅親侍湔洗因謂左右曰吾殺人多矣不假佛力何以解其寃報乎

何景真



景真武陵人少以強勇隸朗團軍希萼入朗州署步軍都指揮使乾祐三年希萼攻湖南命景真率步騎三千出竹柵屯兵楊柳橋以逼其城湖南指揮使韓禮率步騎五千陣於橋而景真登橋望之見旗幟不整曰此非我敵也乃縱兵擊之潭人大亂奔入城中禮被破傷至其家而卒明日城陷希萼之攻長沙也以其子光贊守武陵至是既平湖南乃以景真爲朗州衙內指揮使以翊爲光贊王逵周行逢叛於長沙以所部兵奔歸朗州廢光贊奪其印綬而立馬光惠景真不能拒後又與王

逵同請劉言爲帥會希崇逐希萼而自立請援於江南邊鎬率師入長沙劉言王逵同謀逐鎬乃結景真爲十指揮使率舟師同攻湖南鎬遁走奏授景真檢校太尉靜江軍節度使景真求歸治所言不許留於長沙與王逵不協求歸朗州許之時劉言已爲使相景真不能下之每使酒悖慢言不勝其忿且意王逵等遣景真伺已也將誅逵景真亦欲殺言以據朗州事未及發逵皆偵知之因與周行逢密謀將先誅景真後圖劉言會廣南兵入境因僞召景真爲招討使會兵於長沙景真卽日

以牙兵百餘人徑往湖南遠迎勞於郊相見甚歡館於馬氏之故第宴飲彌日多選妓女寘帳幄中景真留連月餘遠乃遣人偽自朗州來者傳劉言之命就詰景真曰邊寇搶攘委公以戎事公耽淫縱酒遲留不發太師以公觀望命械公歸西府時景真已醉恟恍不知所為乃俛首就縛送朗州殺之於路

九國志卷十一終

九國志卷十二

宋 張 唐 英 補 撰

北楚武信王於梁開平元年據有荊州旋得歸峽至宋

乾德改元國除傳襲四世五帥凡五十七年

武信王姓高名季興字貽孫陝州硤石人本名季昌避後唐諱更今名初隸朱友讓得見全忠奇其才命友讓畜為子冒姓朱氏補制勝軍使天復三年拜宋州團練使徙潁州防禦使復姓高氏梁開平元年五月拜荆南節度使乾化四年八月封渤海王龍德三年

十月戊寅梁亡入覲於後唐同光二年三月丙午封南平王天成二年因掠唐所部送蜀貨削官爵乾真二年六月稱藩於吳是年十二月丙辰薨年七十一諡武信塋於江陵城西之龍山鄉

文獻王名從誨字遵聖季興長子既襲位吳以爲節度使懼唐見討復修職貢時爲嗣位之明年唐天成四年也是年七月甲申唐復以爲節度使追封季興爲楚王長興三年二月賜爵渤海王應順元年正月改封南平王荆南介於吳楚自吳稱帝而南漢閩楚皆

修貢中原假道境上自季興以來常邀掠貨物諸道移書自請責卽復還之無慚色其後南漢與閩稱帝從誨所嚮稱臣利其賜予諸國曰爲高賴子又曰高無賴漢乾祐元年十一月癸卯薨年五十八塋龍山鄉明年漢加諡文獻

真懿王名保融字德長從誨第三子漢乾祐元年十二月丁丑漢以爲荆南節度使周廣順元年封渤海郡王顯德元年正月丙子進封南平王宋建隆元年八月薨年四十一塋龍山鄉宋加諡真懿

侍中名保勗字省躬從誨第十一子保融同母弟也保融卽世宋以爲荆南節度使建隆三年十一月卒年三十九贈侍中

侍中名繼冲字成和保融長子保勗旣歿宋以爲荆南節度使乾德元年二月宋師至納土出降十月至闕下授武寧軍節度使鎮彭門幾十年開寶六年卒年三十一贈侍中

北楚

李景威

景威公安人幼隸於軍而頗有智畧累以戰功遷雲猛指揮副使保勗以爲衙內兵馬副使繼冲嗣立多委任之初聞慕容延釗等伐張文表景威乘間見繼冲曰今王師雖稱假道以收湖湘然觀其勢恐因而襲我景威欲效犬馬之力願假兵三千人於荆門中道險隘處設伏候其夜行發伏攻其上將王師自必退却回軍收張文表以獻於朝廷則公之功業大矣不然則有搖尾求食之禍繼冲曰吾家世世貢奉朝廷必無此事爾無過慮况爾非慕容延釗之敵也景威又曰俗傳江陵諸處

有九十九洲若滿一百則有王者興自武信王之初江  
 心深浪之中忽生一洲而滿百昨此洲漂沒不存茲亦  
 可憂繼冲又不聽景威知計不行自扼吭而死及王師  
 入城繼冲悔不用其言太祖聞景威之計曰彼忠其主  
 也命王仁瞻厚恤其家

九國志卷十二終

